

luntas iterum est vel naturalis, hinc *Pietas*, vel *Lex*, hinc Jus divinum positivum; vel superior est pacto, ut homo, in Jus Civile. Pietas igitur tertius est gradus Juris Naturæ, tribuitque cæteris perfectionem & effectum. Nam Deus, quia omniscius & sapiens est, Jus merum & æquitatem confirmat; quia omnipotens, exequitur. Hinc coincidit utilitas generis humani, imò decor & harmonia mundi, cum voluntate divina. Ex hoc principio jam ne bestiis quidem & creaturis abutilicet. Huc reducuntur meditationes *Sforziæ Pallavicini*. Ex hoc fundamento, ne se ipso quidem abutilicet, quia nos ipsimet sumus Dei, cui omnipotentia tribuit jus in omnia. Hinc illud præceptum: *Honestè vivere*. Cùmque Jus strictum & æquitas careat vinculo Physico; Deus accedens efficit, ut quicquid publicè, id est, generi humano & mundo utile est, idem fiat etiam utile singulis; atque ita omne honestum sit utile, & omne turpe damnosum.